

**Uunga siunnersuut: Imaani avatangiisit illersorneqarnissaat pillugu Inatsisartut  
inatsisaat nr. xx, 2017-imeersoq**

*(Saqq.: Pinngortitamut, Avatangiisinullu Naalakkersuisoq)*

**pillugu**

**Eqqissimatitsinermut Avatangiisinullu Ataatsimiititaliap**

**ILASSUTITUT ISUMALIUTISSIISUTAA**

**Siunnersuutip pingajussaaneerpeqarneranut saqqummiunneqartoq**

Suliarinerani Ataatsimiititaliami uku peqataapput:

Inatsisartunut ilaasortaq Kelly Berthelsen, Inuit Ataqatigiit, siulittaasoq

Inatsisartunut ilaasortaq Knud Kristiansen, Siumut, siulittaasup tullia

Inatsisartunut ilaasortaq Ineqi Kielsen, Siumut

Inatsisartunut ilaasortaq Villy Olsvig, Inuit Ataqatigiit

Inatsisartunut ilaasortaq Henrik Fleischer, Partii Naleraq

Ulloq 18. Maj UPA 2017-imi aappassaaneerpeqarnerata kingorna Ataatsimiititaliap  
siunnersuut misissorpaa.

**1. Siunnersuutip imaa aamma siunertaa**

Inatsisissatut siunnersuut marlunnik pingaarnernik siunertaqarpoq, siullerlu tassaavoq imaani avatangiisit pillugit inatsiseqarnerup nunani tamalaani inatsisinut atuuttunut naapertuuttunngornissaa. Aappaa tassaavoq Kalaallit Nunaanni avatangiisinut tunngasunut annertunerusumik naleqqussakkanik, aammalu imaani avatangiisinut maleruagassiinermut Kalaallit Nunaanni kissaatigineqartut piumasaqaatigineqartullu aallaavigalugit, nutaanik maleruagassaqalersitsinissaq. Kissaataavortaaq pinngortitap avatangiisillu illersorneqarnissaat, taamaalillunilu inuiaqatigiinni ineriartornerup piujuartitsineq tunngavigalugu inuit inuunerannut atugassarititaasut ataqqillugit, aammalu uumassusillit ataqatiginnerannut piujuartitsisussamik tunngaveqarluni ingerlasinnaanissaa.

Inatsisissatut siunnersuummi aalajangersakkat assigiinngitsut, mingutsitsinissap pinngitsoorneqavinnissaanik, mingutsitsisoqareernerani ajoqusiinerit

killilersorneqarnissaannik, aammalu sananeqaatinik atortunillu ajoqusiinnaasunik imaanut immallu silaannartaanut aniatitsisarnerup annikillisinnissaanik suliniuteqartoqarnissaanik siunnerfeqartut aqcutigalugit anguniarneqarpoq.

Inatsisissatut siunnersuummi nutaaliornertut taaneqarsinnaapput upalungaarsimaneq aamma mingutsitsinermik alapernaarsuineq pillugit maleruagassat sukannernerusut, imaatigut angallannerup killilersorneqarnissaa pillugu maleruagassat aammalu umiarsuarnut qimaannakkanut tunngatillugu akuliunnissamat nutaamik periarfissaqalenera. Nunani tamalaani maleruagassanit nutaanit, ilanngunneqartunit, taaneqarsinnaapput imeq oqimaaloqutaasoq aamma uumasut takornartat pillugit maleruagassat kiisalu imaanut eqqakkanik imaarsisarneq pillugu maleruagassat sukannernerusut. Tamatuma peqatigisaanik inatsisissatut siunnersuut inatsisaavoq sinaakkutissaq, tassa imaappoq mingutsitsinermik pitsaaliuinissaq pillugu peqqussutinik assigiinngitsunik arlalinnik pilersitsinissamik periarfissiisoq.

## **2. Siunnersuutip Inatsisartunit suliarineqarnera**

Siunnersuut siullermeerneqarami ataatsimiititaliami suliassanngorlugu innersuunneqarpoq, taamaalillunilu siunnersuut pillugu isumaliutissiissusiortoqarluni. Ataatsimiititaliap isumaqatigiittup aappassaaneerinermi isumaliutissiissummini siunnersuut akuerineqassasoq inassutigaa. Pingajussaaneerineq sioqqullugu siunnersuut ataatsimiititaliamut suliassanngortinneqaqqippoq, taamaalilluni ataatsimiititaliaq Naalakkersuisut allannguutissatut siunnersuutaata isummerfiginissaanut periarfissaqarniassammat.

## **3. Ataatsimiititaliap siunnersuummik suliaqarnera**

Ataatsimiititaliap pingajussaaneerininissamat Naalakkersuisut allannguutissatut siunnersuutaat misissorpaa, annertunerusumillu apeqqutissaqarani erseqqisaatissaqaraniluunniit.

Inatsisissatut siunnersuutip danskisuaa kalaallisuuvalu maanna imminnut naapertuutilermata ataatsimiititaliap naammagisimaarpaa.

Inatsisissatut siunnersuutip siullermeerneqarnerani Partii Naleqqap oqaaseqartartuata uparuarpaa, siunnersuutip kalaallisuuani oqaaseq ”pillaat” arlaleriarluni atorneqarsimasoq. Oqaaseqartartup tamanna naammaginngilaa, Kalaallit Nunaannimi pillaasarnermik inatsiseqanngimmat. Taamaattumik maanna inatsisissatut siunnersuummi danskisuaa kalaallisuuvalu imminnut naapertuutilermata ataatsimiititaliap naammagisimaarpaa, maannami oqaaseq ”pineqaatissiineq” atorneqalermat.

**4. Ataatsimiititaliap inassutaa**

**Taamaalilluni ataatsimiititaliap isumaqatigiittup inassutigaa siunnersuut akuerineqassasoq.**

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut pingajussaaniigassanngortippaa.

---

Kelly Berthelsen,  
Siulittaasoq

---

Knud Kristiansen

---

Ineqi Kielsen

---

Villy Olsvig

---

Henrik Fleischer